



## ***Les a mona fyonse ifyo acitile ukuti fisuma sana (Citendekelo 1:31)***

### **IMBILA YA KWARESHIMA - 2023 UKUFUMA KULI BA SHIKOFU**

Mwe bamunyanane muli Kristu,

1. Citatu ca Mito (Ash Wednesday) e lutampulo lwa kubalilapo mu lwendo lwa nshiku amakumi yane (40), ulwitwa *Kwadeshima* mu mwaka wa Eklesia. Lwendo lutakatifu ulutufisha ku kusefya kwa cila mwaka ukwa bwile bwe Pasaka ubwa mfwa no kushukuka kwa Mulubushi wesu Yesu Kristu.
2. Eklesia wa kuno Mansa alaenda ulu lwendo pa nshita aibimbile mu mulimo wa kubaka no kucingilila nyinefwe icalo ne fibumbwa fyonse ifyabamo mu kukonka icikomo (*Pastoral Theme*) ica uno mwaka 2023. Mwi pepo tusalika cila bushiku tulalomba ukuti Les a acindikilwe mu fibumbwa ifyo apanga pamo nga ndume yesu Kasuba, inkashi Mweshi ne Ntanda, bamunyanefwe Chipupu na Mwela, nkashi yesu Menshi na ndume yesu Mulilo ukubikapo fye nyinefwe Calo (*cf. Ulwimbo lwa Fibumbwa ulwakwa Fransisko waku Assisi*). Muli uyu musango tuleampana ne filengwa na Les a fyonse ngo lupwa lwesu ulwatuntuka kuli shibo umo, Kabumba Les a. Pa nshita imo ine, tulesubila no ukulasunga bwino aba bamunyanefwe abo Les a asekesha kuli fwe bantu pakuti nabo baletusunga ukulingana nomo Les a abatantikila.
3. Ilyo Kabumba Les a acitile umulu ne calo na fyonse ifyabamo, amwene ukuti fyali fye bwino (Citendekelo 1:4, 12, 18, 21, 31). Icishinka cakutila pali ndakai ukuyemba no busuma bwe sonde file fileloba pa mulandu wa bonaushi ubucitika ku filengwa na Les a. Cila mwaka imintapendwa ya filimwa ne miti iyalekanalekana ukubikapo fye ne nama sha mpanga, isabi, utuni no tushishi utwamisango-misango fileloba. Ukwaluka kwa michele (*climate change*) nako kuleilako fye pa ntanshi no kuleta ubucushi ubukalamba pakati ka bwina bantu. Imilokele ya mfula taileishibikwa bwino, ulusuba, umwela ne mpepo nafyo ilingi line fileisa mu nshila ishabonaushi. Cilemoneka kwati mayo calo no lwelele nabafulwa pafyo fwe bwina bantu twabasunga bulukubuluku. Ulukuta lwakwa Les a kuno mwesu lulefwaya ukubulamo ulubali mu kucingilila ubu bwafya ukupitila mu kusambilishanya ne milimo ya kubaka no kucingilila nyinefwe Calo.

4. Ilyo twatendeka ino nshita ya *Kwadeshima*, nacilinga ukutontonkanya na pali uyu wine mulandu ilyo tuleilengula no kulapila pa kubwelela mu nshila yakwa Lesa. Tuli no kulanguluka pa lukakala no bonaushi ubucitika ku calo cayemba ico Lesa Kabumba asekeshe kuli fwe bantu. Ukulapila kwesu nakumonekele mukuleka imibele yabipa iya kutema imiti icitemeteme, ukoca impanga icoceoce, ukwipaya isaba mu mimana mu nshila ishishasuminishiwa no kuposaika ifintu ifishibola mu mansa shesu, mu misebo na mu mifolo. Ilyo tulewikishanya na Lesa na bantu banensu muli luno lwendo lwa *Kwashesima*, twilabako na mayo Calo na bamunyinefwe bonse ba Filengwa-na-Lesa abo twalufyanyako – tubweshe icumfwano na bucibusa bwesu.
5. Namukumbilwa bonse ipaalo ne neema ya kwenda bwino luno lwendo lwa kulapila no kufika ku nsansa she Pasaka nga bantu abawikishanya na Lesa, na bantu banensu ne fibumbwa fyonse. Muli no kusanga icikoseleshi mulekabila ukupitila mu kusalika umute no kumfwa Ishiwi lyakwa Lesa cila bushiku, ukufunga no kuikanya ku fintu ifishikuula ubumi bwenu elyo no kulangulukila noku kumbusukako abaleculisha pakati kesu mu musango Yesu atufundile (Mateo 6:1-18).
6. Ndelomba no kuti indupwa, ifitente ne filonganino fya butumishi filesanga inshita ya kusambilishanya no kumfwikisha umulolele Imbila Nsuma iikalabilikishiwa cila Mulungu pa kuipekanya bwino ukwisa sefya inshikunkulu ye Pasaka. Kabili muma parishes yonse, ukutendeka mu mulungu wa Bumo mpaka no mulungu wa Busano, muli no kulaaba umutulo wa *Kwadeshima (Lenten Collection)* uukatumba kuma offeshi yaba Shikofu.
7. Natwendele bonse capamo luno lwedo lwa *Kwadeshima* mu mupashi wa Eklesia uwendela pamo (*Synodal Church*) kabili uufukatila umuntu onse ne citemwiko cakwa Kristu. Imfumu ibe Nenu, imupeelee ne Cibote.



+Patrick Chisanga, OFM Conv.

*Pali buno bushiku bwa **Citatu ca Mito** pa 22 mu Mweshi wa **Kabengele**  
**Kakalamba** mu Mwaka wa 2023*